



Sumáriu Kazu

Tribunál Judisiál Primeira Instánsia Suai

Abril 2023

Afirmasaun: Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la reprezenta JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Judisiál Primeira Instánsia Suai

1. Totál kazu ne'ebé JSMP monitoriza :8

Artigu	Tipu Kazu	Númeru
Artigu 145 Kódigu Penál (KP), no artigu 2,3, 35 Lei Kontra Violénsia Doméstika (LKVD)	Ofensa ba integridade física simples ho natureza violénsia doméstika (artigu 2 kona-ba konseitu violénsia doméstika, artigu 3 kona-ba relasaun família, artigu 35 kona-ba tipu krime violénsia doméstika no 36 kona-ba krime sira violénsia doméstikian hanesan krime publiku)	2
Artigu 177 KP, artigu 182 KP no artigu 2,3, 35 Lei Kontra Violénsia Doméstika (LKVD)	Abuzu seksuál ba menór agravaun ho natureza violénsia doméstika (artigu 2 kona-ba konseitu violénsia doméstika, artigu 3 kona-ba relasaun família, artigu 35 kona-ba tipu krime violénsia doméstika no 36 kona-ba krime sira violénsia doméstika nian hanesan krime publiku)	1
artigu 177 KP	Abuzu seksuál ba menór	1
Artigu 171 KP	Koasaun seksuál	1
Artigu 154 KP no artigu 2,3, 35 Lei Kontra Violénsia Doméstika (LKVD)	Maus-tratus kónjuje ho natureza violénsia doméstika (artigu 2 kona-ba konseitu violénsia doméstika, artigu 3 kona-ba relasaun família, artigu 35 kona-ba tipu krime violénsia doméstika no 36 kona-ba krime sira violénsia doméstika nian hanesan krime publiku)	1

Rua Beco Lakateu, Aldeia Manu fuik,
Suku Colmera, Administrativu Vera Cruz
Dili Timor Leste
PoBox: 275

Telefone: 3323883 | 77040735

www.jsmp.tl

info@jsmp.tl

Facebook: www.facebook.com/timorleste.jsmp

Twitter: @JSMPtl

Artigu 1757, 1758, 1759, 1762, 1765, 1786, 1782, 1804, 1805 KS	Ezersísiu podér paternál	1
Artigu 178 KP	Aktu seksuál ho adolexente	1
Totál		8

2. Totál desizaun ne'ebé JSMP monitoriza:7

Tipu pena	Artigu	Númeru
Suspensaun ba prizaun nia ezekusaun	Artigu 68 KP	5
Pena prizaun	Artigu 66 KP	1
Omologa		1
Totál		7

3. Totál kazu sira ne'ebé adia tuir JSMP nia monitorizasaun:0

4. Totál kazu sira ne'ebé sei kontinua tuir JSMP nia monitorizasaun: 1

B. Deskrisaun sumáriu julgamentu ba desizaun kazu sira:

1. Krime koasaun Seksuál

Nú. Prosesu : 0025/21.CVMCT
 KompozisaunTribunál : Koletivu
 Juis : Dr. Jose Maria de Araújo, Dr. Naason Mário Armindo Marques Doutel no Dra. Patricia de Araújo F. B. M Xavier
 Prokuradór : Dr. Nelson J. S. Magno
 Defeza : Dr. Octavio Manuel da Costa Amaral
 Desizaun : Pena prizaun tinan 2 suspende ba tinan 3

Iha 13 Abril 2023, Tribunál Judisiál Primeira Instánsia Suai prezide julgamentu leitura akordaun ba krime koasaun seksuál ne'ebé envolve arguidu RdC hasoru lezada NMdC, iha Munisípiu Covalima.

Akuzasaun Prokuradór

Prokuradór akuza katak iha 05 Outobru 2021, iha oras tuku 19:00 kalan lezada buka hela ninia alin no lahetan, lezada decide fila ba uma, maibé iha dalan klaran arguidu bolu lezada hatete titi o hein lai Elvi husu o, mesmu nune'e lezada hein arguidu no arguidu too mai lahatete buat ida no hakuak kedas lezada no buti lezada nia hirus matan parte loos, lezada hikis aan maibé arguidu kaer metin lezada no taka lezada niaibun, arguidu kontinua buti lezada nia hirus matanno husu lezada dehan ó eskola iha ne'ebé, lezada hatan dehan eskola iha Likisá, hafoin arguidu husik lezada nia hirus matan bainhira kareta nia lampu leno kona arguidu ho lezada, depoisde kareta liu tiha arguidu hakuak fali lezada no kontinua kaer lezada nia hirus matan no derepente lezada nia alin bolu lezada, arguidu husik lezada no hatete katak labele ko'lia sai buat ne'ebé ita halo.

Prokuradór akuza arguidu kontra artigu 171 KP kona-ba koasaun seksuál ho moldura penál tinan 2 too tinan 8.

Produsaun ba prova sira

Iha julgamentu, arguidu deklara partiasalmente katak faktu balun loos no balun la loos, arguidu deklara katak iha momentu ne'ebá lezada buka hela nia alin no arguidu besik ba lezada no arguidu kaer de'it lezada nia kabaas no konversa halimar, arguidu deklara tan katak la kaer lezada nia orgaun sensitivu sira, tanba konsidera lezada hanesan oan rasik, kolega di'ak ho arguidu nia oan. Arguidu deklara katak foin mak mai hatan iha tribunál.

Alende ne'e lezada kontinua konfirma faktu sira hotu iha akuzasaun no deklara katak depoisde akontesimentu kalan ne'e lezada informa kedas ba ninia inan no lezada nia inan nerboju foti aikabelak ida baku kedas ba arguidu nia kotuk laran no husu kedas ba arguidu dehan *nusá ó kaer hau nia oan nia hirus matan*, arguidu hatan ba lezada nia inan dehan hau sei lahalo tán ona, lezada deklara tan katak haree arguidu sente moe no tauk.

Alegasaun finál

Prokuradór haktuir katak arguidu provadu komete krime hasoru lezada mesmu iha julgamentu arguidu nega faktu prinsipal sira, maibé lezada kontinua konfirma hotu faktu sira hotu, nune'e prokuradór husu ba tribunál atu kondena arguidu tuir artigu 171 KP.

Entretantu, defeza husu ba tribunál haree sirkunstansia hanesan arguidu foin mak mai hatan iha tribunál nune'e husu ba tribunál atu fó pena kamaan ba iha arguidu.

Desizaun

Depoisde avalia faktu sira hotu, tribunál prova katak arguidu komete krime koasaun seksuál hasoru lezada. Bazeia ba faktu provadu sira ne'e no tetu mós sirkunstansia atenuante hanesan arguidu foin mak mai hatan iha tribunál, nune'e tribunál konklui prosesu ne'e no kondena arguidu ho pena prizaun tinan tolu suspende nia ba tinan tolu no tribunál kondena arguidu selu kustu judisiál US\$25.00.

2. Krime ofensa ba integridade fízika simples ho natureza violénsia doméstika

Nú. Prosesu : 0029/22.ANANV
Kompozisaun Tribunál : Singulár
Juis : Dr. Samuel da Costa Pacheco
Prokuradór : Dr. Rafael Jeronimo Gusmão
Defeza : Dr. Domingos dos Santos
Desizaun : Fulan 3 suspende ba tinan 1

Iha 24 Abril 2023, Tribunál Judisiál Primeira Instánsia Suai prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu EG hasoru nia feen AdCdS, iha Munisípiu Ainaro.

Akuzasaun prokuradór

Prokuradór akuza katak iha 18 Dezembru 2021, iha oras tuku 9:00 dadeer, arguidu tuku dala haat iha lezada nia kabaas parte karuk no kanotak parte karuk, silu lezada nia liman karuk no buti dala ida iha lezada nia kakorok. Antes ne'e arguidu ho lezada goza malu, arguidu dehan lezada oin aat no lezada mós goza arguidu ho liafuan hanesan, arguidu lasimu, nerbosu no halo agresaun hasoru lezada. Depoisde akontesementu lezada ba halo kedas tratamentu iha sentru saúde no kontinua ba apresenta keixa iha eskuadra Polísia Ainaro.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál tinan 3 ka multa konjuga ho artigu 2, (a) 3 (c), 35 (b) no 36 LKVD.

Produsaun ba prova sira

Iha julgamentu, arguidu konfesa ba faktu sira hotu iha akuzasaun no deklarata katak arrepende nia hahalok, baku feen ne'e ladi'ak no promete iha futuru sei larepete ninia hahalok hanesan hasoru lezada, foin mak primeiravés mai hatan iha tribunál no depoisde akontesimentu liu loron rua di'ak malu kedas.

Alenden ne'e, lezada kontinua konfirma faktu sira iha akuzasaun no reforsa katak depoisde akontesimentu liu loron rua di'ak malu kedas no perdua ona arguidu.

Alegasaun finál

Prokuradór haktuir katak arguidu komete krime hasoru lezada ne'ebé arguidu rasik konfesa no konfirma husi lezada, mesmu sira di'ak malu ona maibé atu halo prevensaun ba krime ne'e la kontinua akontese iha futuru, nune'e husu ba tribunál atu kondena arguidu ho pena prizaun fulan tolu suspende ba tinan ida.

Entretantu defeza haktuir katak iha prosesu julgamentu arguidu konfesa, arrepende nia hahalok no depoisde akontesimentu sira di'ak malu fali no foin mak mai hatan iha tribunál nune'e husu ba tribunál atu fó justisa ne'ebé justu no adekuadu ba arguidu.

Desizaun

Depoisde avalia faktu sira, tribunál prova katak arguidu komete aktu krime hasoru lezada hanesan iha akuzasaun. Bazeia ba faktu provadu sira ne'e no tetu mós sirkunstansia atenuante sira hanesan arguidu foin mak mai hatan iha tribunál, arrepende ninia hahalok no to'o agora arguidu la baku ona lezada, nune'e tribunál konklui prosesu ne'e no kondena arguidu ho pena prizaun fulan tolu suspende ba tinan ida.

3. Krime ofensa ba integridade fízika simples ho natureza violénsia doméstika

Nú. Prosesu : 0010/22.ANHTB
Kompozisaun Tribunál : Singulár
Juis : Dr. Nasson Mário Armindo Marques Doutel
Prokuradór : Dr. Rafael Jeronimo Gusmão
Defeza : Dr. Domingos dos Santos
Desizaun : Pena Prizaun fulan 3 suspende ba tinan 1

Iha 24 Abril 2023, Tribunál Judisiál Primeira Instánsia Suai prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu RAdJ hasoru nia feen CdJ, iha Munisípiu Ainaro.

Akuzasaun prokuradór

Prokuradór akuza katak iha 28 Agostu 2022 iha oras tuku 8:00 dadeer, arguidu tuku dala ida iha lezada nia ulun, dala ida iha kotuk laran no dulas lezada nia kabun. Antes agreasaun ne'e lezada haruka arguidu atu kesi bibi maibé arguidu lakohi no sira diskute malu, arguidu nerboju halo agreasaun hira ne'e hasoru lezada.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál tinan 3 ka multa konjuga ho artigu 2, (a) 3 (c), 35 (b) no 36 LKVD.

Produsaun ba prova sira

Iha prosesu julgamentu, arguidu konfesa totál faktu sira iha akuzasaun no deklara katak baku feen ne'e ladi'ak, arrepende nia hahalok, promete sei larepete tán ninia hahalok hanesan iha futuru, arguidu mós deklara katak foin primeiravés mai hatan iha tribunál.

Alenden ne'e lezada kontinua konfirma faktu sira hotu iha akuzasaun no deklara katak liu tiha loron haat sira di'ak malu kedas, depoisde akontesimentu arguidu husu deskulpa no to'o ohin loron arguidu labaku ona lezada.

Alegasaun finál

Prokuradór haktuir katak arguidu provadu no prosidente tuir faktu sira iha akuzasaun, arguidu rasik konfesa no konfirma husi lezada, tanba ne'e husu ba tribunál atu kondena arguidu ho pena prizaun fulan neen suspende ba tinan ida.

Entretantu defeza husu ba tribunál aplika pena multa ho konsiderasaun iha julgamentu arguidu konfesa, arrepende ninia hahalok, foin mak mai hatan iha tribunál no depoisde akontesimentu di'ak malu fali no to'o ohin loron arguidu larepete tán ninia hahalok.

Desizaun

Depoisde avalia faktu sira hotu, tribunál prova katak arguidu komete aktu ofensa integridade fízika simples ho natureza violénsia doméstika hasoru lezada.

Bazeia ba faktu provadu sira ne'e no tetu mós sirkunstansia atenuante sira hanesan arguidu foin mak mai hatan iha tribunál, arrepende ninia hahalok no depoisde akotesimentu to'o agora arguidu la baku ona lezada, nune'e tribunál konklui prosesu ne'e no kondena arguidu ho pena prizaun fulan tolu suspende ba tinan ida.

4. Kazu sivíl regulasaun ba ezersísiu podér paternál

Nú. Prosesu	: 0019/23. CVTDS
Kompozisaun Tribunál	: Singulár
Juis	: Dr. Eusébio Xavier Víctor
Prokuradór	: Dr. Rafael Jeronimo Gusmão

Defeza : Dr. Jonas Henrique da Costa
Desizaun : Omologa Akordu

Iha 25 Abril 2023, Tribunál Judisiál Primeira Instánsia Suai prezide julgamentu tentativa konsiliaun ba kazu regulasaun ezersísiu podér paternál envolve autór MMB hasoru rekeridu HM (aman) no rekerida JG (inan), iha Munisípiu Covalima.

Termu no fundamentu sira

Fulan no loron la apura, maibé iha 2019, rekeridu sai husi uma tanba deskonfia rekerida amante ho mane seluk, rekeridu abandona sira nia oan no la fó alimentasaun, nune'e prokuradór representa menór hatama asaun ida ne'e, hodi nune'e rekeridu atu tau matan ba menór ninia nesesidade loro-loron nian.

Kazu ne'e relasiona ho ezersísiu podér paternál tuir artigu 1757, 1758 (1), 1759, 1762, 1765, 1786, 1787(2), 1782, 1804 no 1805 KS, kona-ba responsabilidade inan-aman ba menór sira.

Tentativa konsiliaun

Iha julgamentu tentativa konsiliaun ne'e, rekeridu no rekerida konkorda menór nafatin hela ho rekerida no rekeridu sei ba vízita menór semana ida dala rua iha loron sabadu no loron domingu. Alende ne'e rekeridu konkorda kada fulan fó osan US\$15.00 ba sira nia oan menór.

Alegasaun finál

Prokuradór representa menór no defeza husu ba tribunál atu omologa akordu ne'ebé rekeridu no rekerida konkorda hamutuk atu tau-matan ba menór.

Desizaun

Bazeia ba parte rua nia akordu kona-ba alimentasaun, hela fatin no rejime vizita nian, tribunál konklui prosesu ne'e no omologa akordu ne'e.

5. Krime maus-tratus ba kónjuje ho natureza violénsia doméstika

Nú. Prosesu : 0026/21.CVSUI
KompozisaunTribunál : Koletivu
Juis : Dr Jose Maria de Araujo, Dr. Naason Mário Armindo
Marques Doutel no Dra. Patricia de Fatima Xavier
Prokuradór : Dr. Rafael Jeronimo Gusmão
Defeza : Dr. Domingos dos Santos
Desizaun : Pena prizaun tinan 2 suspende ba tinan 2

Iha 27 Abril 2023, Tribunál Judisiál Primeira Instánsia Suai prezide julgamentu leitura akordaun ba krime maus-tratus ba kónjuje ho natureza violénsia doméstika ne'ebé envolve arguidu JC hasoru nia feen MAM, iha Munisípiu Covalima.

Akuzasaun prokuradór

Prokuradór akuza katak iha 24 Marsu 2021, iha oras tuku 15:00 lokraik arguidu basa dala barak iha lezada nia hasan parte loos, tebe dala barak iha lezada nia kidan no lori fatuk

no martelu tuda lezada maibé la kona no ameasa lezada dehan '*molok hau sai husi uma, hau oho tiha ó mak hau sai husi uma*'.

Loron no fulan haluha ona, iha 2020, arguidu lori ai bebak baku dala barak iha lezada nia kotuk laran, basa dala barak iha hasan sorin loos no karuk no tebe dala barak iha parte kidan.

Alende ne'e lezada konfirma katak durante moris hamutuk arguidu sempre halo agresaun hasoru lezada ho maneira baku, tebe, no lori ai baku lezada.

Prokuradór akuza arguidu kontra artigu 154 KP kona-ba maus-tratus ba kónjúje ho moldura penál tinan 3 ka multa konjuga ho artigu 2, 3 (a) no 35 (a) LKVD.

Produsaun ba prova sira

Iha prosesu julgamentu, arguidu konfesa faktu sira hotu iha akuzasaun, arguidu deklarara baku lezada tanba rona informasaun husi viziñu katak lezada amante ho mane seluk, arguidu deklarara tán katak foin mak mai hatan iha tribunál, arrepende ninia hahalok promete iha futuru sei lakomete tán krime hasoru lezada, depoisde akontesimentu di'ak malu kedas no to'o ohin loron la repete ona ninia hahalok.

Tanba arguidu konfesa integralmente, prokuradór husu ba tribunál atu presinde lezada no testemuña.

Alegasaun finál

Prokuradór, haktuir katak iha julgamentu arguidu konfesa faktu sira hotu no promete iha futuru sei la repete ninia hahalok, maibé prokuradór haree katak kazu violénsia doméstika aas tebes nune'e atu halo prevensaun ba krime ne'e, husu ba tribunál kondena arguidu ho pena prizaun tinan 1 fulan neen suspende ba tinan 2.

Entretantu defeza haktuir katak iha julgamentu arguidu konfesa no foin mak mai hatan iha tribunál, arrepende nia hahalok no promete sei labaku tán lezada, di'ak malu ona, nune'e husu ba tribunál atu kondena arguidu ho pena suspensaun.

Desizaun

Depoisde avalia faktu sira hotu, tribunál prova katak arguidu komete krime hasoru lezada, arguidu rasik konfesa t.

Bazeia ba faktu provadu sira ne'e hotu no tetu mós sirkunstansia atenuante sira hanesan arguidu foin mak mai hatan iha tribunál, arrepende ninia hahalok no promeste sei larepete tán hahalok hanesan iha futuru, nune'e tribunál konklui prosesu ne'e no kondena arguidu ho pena prizaun tinan rua suspende ba tinan rua.

6. Krime abuzu seksuál ba menór agravasaun ho natureza violénsia doméstika

Nú. Prosesu : 0034/22.BBBGD

KompozisaunTribunál : Koletivu

Juis : Dr. Naason M. A. Marques Doutel, Dr. Jose Maria de

Araújo no Dra. Patricia de Araújo F. M. G. B. Xavier
Prokuradór : Dr. Nelson J.S Magno
Defeza : Dr. Angelmo Pinto
Desizaun : Pene Prizaun tinan 15

Iha 27 Abril 2023, Tribunál Judisiál Primeira Instánsia Suai prezide julgamentu leitura akordaun ba krime abuzu seksuál ba menór ho natureza violénsia doméstika ne'ebé envolve arguidu VPSs hasoru oan entiada JdOdD, iha Munisípiu Bobonaro.

Akuzasaun prokuradór

Prokuradór akuza katak iha 14 Novembru 2022, iha oras tuku 17:30 lokraik, lezada fasé hela bikan iha dapur kotuk, derepente arguidu rasta lezada nia liman ba iha arguidu nia kuartu no buti lezada nia hirus matan no rei lezada nia ibun, derepente arguidu nia feen mai uma nune'e arguidu haruka lezada sai lalais ba iha uma liur. Lakleur arguidu mós tuir lezada hodi ameasa dehan *sé ó hatete ba ó nia ama boot hau sei oho tiha ó.*

Akontese segundu iha 15 Novembru 2022, iha oras tuku 16:30 lokraik, lezada fase bikan iha nia avo fetu nia uma no derepente arguidu kaer lezada nia liman no rasta ba arguidu ninia uma no tama ba arguidu nia kuartu, arguidu hasai tiha ninia kalsa no haruka lezada kaer arguidu nia orgaun seksuál no haruka hatama ba lezada nia ibun maibé lazada lakohi no dudu monu tiha arguidu no lezada halai sai ba liur, arguidu duni tuir no baku dala haat tui-tuir malu iha lezada nia kotuk laran rezulta moras no halo lezada tanis, bainhira arguidu nia feen mai no haree lezada tanis no husu lezada *nusá mak ó tanis, lezada hatan katak fatuk mak monu no kona iha ain,* tuir mai lezada nia inan hakiak ba sosa aimoruk fó lezada hemu.

Akontese terseiru iha 16 Novembru 2022, iha oras tuku 3:00 madrugada, lezada sente soe bee ki'ik moras nune'e fó hatene ba nia avo ho lezada atu sai ba haris fatin maibé lezada nia avo fetu *hatete 'sé ó tauk lalika ba haris fatin soe bee ki'ik iha de'it uma laran aban mak rega'*, lezada sai ba haris fatin no bainhira lezada atu tama fali ba uma laran arguidu husi kotuk rasta lezada nia liman no liman sorin taka lezada nia ibun no rasta ba iha dapur laran, arguidu hasai nia kalsa no hasai hotu lezada nia kalsa no arguidu hodi ninia orgaun seksuál kose ba lezada nia orgaun seksuál, maibé derepente motorizada ida tesik mai nune'e, arguidu husik lezada ba hafuu motor ne'e no lezada mós hamri'ik foti nia roupa hatais no halai ba testemuña RG nia uma no fó hatene dehan apa boot book hau, testemuña ho nia maun no nia alin sae ba tuda dapur ne'ebé arguidu toba ba maibé arguidu la iha laran ona.

Testemuña RG bolu arguidu nia feen ITB no husu ba arguidu nia feen *ó nia katuas oan iha ne'ebé,* maibé testemuña hatan lahetan ninia katuas oan.

Prokuradór akuza arguidu kontra artigu 177 nú 2 KP konkursu krime kona-ba abuzu seksuál ba menór ho moldura penál tinan 5 to'o tinan 15 no artigu 182 KP agravasaun konjuga ho artigu 2 (c), 3 (d), 35 (b) LKVD.

Produsaun ba prova sira

Iha prosesu julgamentu, arguidu nega faktu sira hotu, arguidu deklarata katak lezada la'os hela ho arguidu maibé hela ho nia avo fetu no dala ruma mak lezada husu osan mak arguidu fó no lezada ho nia avo fetu fós la iha arguidu ho nia feen mak sosa fó ba sira. Arguidu deklarata katak momentu akontese dahuluk, iha lokraik lezada la'os fase bikan maibé halimar de'it nune'e arguidu haruka lezada atu sosa nia pulsa, lezada simu osan ne'e husi arguidu no ba sosa pulsa hodi entrega ba arguidu no lezada mós fila ba nia uma. Iha akontesementu segundu arguidu nunka book lezada tanba la haree lezada.

Akontesementu datoluk arguidu toba iha dapur hodi bele hafuhu nia feen tanba antes ne'e deskonfia nia feen ho mane seluk no nia feen sai ba fatin ruma mós sein kuñesimentu ba nia la'en. Arguidu deklarata liu tán katak antes ne'e arguidu nia feen ho nia família la gusta arguidu no kazu ne'e sira bobar lia de'it.

Iha julgamentu produsau ba prova lezada tauk haree arguidu nune'e juis, prokuradór no defeza deside hodi rona lezada nia deklarasaun iha sala ketak vítima nian.

Alende ne'e lezada kontinua konfirma faktu sira iha akuzasaun no deklarata katak kona-ba arguidu nia feen sai ho mane seluk lezada la hatene no problema entre arguidu ho nia inan ho nia tiun sira lezada mós la iha kuñesimentu, lezada deklarata liu tán katak hela ho nia avo fetu maibé nia inan boot mak hakiak no selu lezada nia eskola.

Testemuña RG hanesan lezada nia inan ki'ik depoimenta katak iha madrugada lezada halai ba iha uma tuku odamatan fanu no hatete dehan apa boot book lezada, nune'e testemuña ho lezada nia tiun ho nia katuas oan sae ba tuda dapur ne'ebé arguidu toba ba, maibé arguidu la iha ona dapur laran, hafoin tuda hotu bolu arguidu nia feen, arguidu nia feen sai mai no testemuña husu *ó nia la'en iha ne'ebé*, maibé arguidu nia feen lahatene, testemuña depoimenta tán katak antes ne'e nunka problema ho arguidu ho nia família.

Testemuña ITB, hanesan lezada nia inan hakiak no arguidu nia feen depoimenta katak kona-ba faktu sira ne'e, testemuña la iha kuñesimentu tanba lezada nunka fó hatene, testemuña depoimenta katak lezada maske toba ho nia avo fetu maibé lezada ninia nesidade ne'e testemuña ho arguidu mak responsabiliza hotu.

Alegasaun final

Prokuradór, haktuir katak iha julgamentu ne'e arguidu tenta nega hotu faktu esensiál sira, maibé lezada kontinua konfirma faktu sira iha akuzasaun no testemuña reforsa katak mesmu lezada hela ho nia avo maibé testemuña ho arguidu mak responsabiliza lezada nia nesidade lor-loron nian, prokuradór konsidera no fiar lezada nia deklarasaun katak arguidu halo duni aktu hasoru lezada ho razaun hirak ne'e prokuradór husu ba tribunál atu kondena arguidu.

Enkuantu, defeza haktuir katak iha julgamentu arguidu deklarata katak lezada la'os hela ho arguidu maibé hela ho nia avo no arguidu nunka book lezada hanesan faktu ne'ebé dun ba arguidu no hanesan arguidu deklarata katak antes ne'e nia toba bebeik iha dapur atu hafuhu nia feen ne'ebé nia deskonfia ho mane seluk. Hahu husi ne'e arguidu nia feen ho

família komesa la gosta ona arguidu, maibé lezada kontinua konfirma faktu sira iha akuzasaun, maske nune'e defeza entende katak testemuña ho lezada tenta boosk no bobar lia hodi duun arguidu ho maneira hanesan ne'e, tanba ne'e defeza dúvida no husu ba tribunál atu absolve arguidu.

Desizaun

Depoisde avalia faktu sira hotu, tribunál prova arguidu komete konkursu krime abuzu seksuál tolu hasoru lezada, mesmu iha julgamentu arguidu nega katak la halo relasaun seksuál ho lezada, maibé lezada konfirma faktu sira hotu iha akuzasaun no reforsa husi testemuña sira.

Bazeia ba faktu provadu sira ne'e no tetu mós sirkunstansia hotu-hotu haleu krime ne'e, nune'e tribunál konklui prosesu ne'e no kondena arguidu ba krime tolu, kada krime tinan ualu, pena sira ne'e halo akumulasaun ba tinan 24 iha prizaun no tribunál konklui no kondena arguidu ho pena únika tinan sanulu resin lima ba arguidu.

7. Krime aktu seksuál adolexente

Nú. Prosesu : 0010/22.CVFHM
Kompozisaun tribunál : Singulár
Juis : Dr. Nasson Mário Armindo Marques Doutel
Prokuradór : Dr. Rafael Jeronimo Gusmão
Defeza : Dr. Angelmo Pinto
Desizaun : Pena Prizaun Tinan 3 Suspende Tinan 3

Iha 27 Abril 2023, Tribunál Judisiál Premeira Instánsia Suai prezide julgamentu leitura sentensa ba krime aktu seksuál adolexente ne'ebé envolve arguidu BDS hasoru lezada RXB, iha Munisípiu Covalima.

Akuzasaun prokuradór

Prokuradór akuza katak iha 23 Setembru 2021 iha oras 03:00 lokraik, iha karau luhan iha Suku Dato Tolu, momentu ne'ebá arguidu ho lezada kontaktu malu hodi hasoru malu iha fatin refere.

Bainhira sira hasoru malu iha karau luhan ne'e, arguidu ho lezada hahu rei malu, susu malu no arguidu kaer lezada nia hirus matan rua, depois arguidu hasai lezada nia kalsa naruk no roupa laran to'o lezada nia ain tur, arguidu mós hasai nia kalsa ho roupa laran no halo relasaun seksuál ho lezada to'o ezekula.

Akontesemeentu ba daruak iha 01 Setembru 2022 iha oras tuku 14:00 lokraik, husi karau luhan, arguidu ba tán lezada iha uma hodi sira nain rua la'o ba iha karau luhan ne'ebé distansia kuaze metru 300 dook husi uma no iha momentu ne'e lezada tein hela iha uma.

Depoisde to'o iha ne'ebá arguidu ho lezada hahu rei malu, arguidu kaer lezada nia hirus matan parte loos nohahu hasai lezada nia kalsa naruk, hasai roupa laran to'o iha ain tur, arguidu mós hasai nia roupa no halo relasaun seksuál ho lezada to'o ezekula.

Lezada foin primeiravés halo relasaun seksuál ho arguidu, antes ne'e la iha namora ho ema seluk, nunca halo relasaun seksuál ho mane seluk, foin primeiravés halo relasaun seksuál ho arguidu. Arguidu nia hahalok ne'e rezulta lezada sente moras no ran sai husi lezada nia orgaun seksuál. Kazu ne'e aneksa ho relatóriu médiku husi Pradet.

Prokuradór akuza arguidu kontra artigu 178 KP kona-ba aktu seksuál ho adoloxente ho moldura penál tinan 5

Produsaun ba prova sira

Iha julgamentu, arguidu nega hotu faktu sira hotu iha akuzasaun, arguidu deklara katak la iha relasaun namorada ho lezada no nunca halo relasaun seksuál ho lezada, arguidu deklara katak iha 2021 nia serbisu iha Díli no nunca mai iha suai.

Antes presta deklarasaun, lezada sente tauk bainhira arguidu iha sala julgamentu, nune'e tribunál hasai arguidu husi sala julgamentu hafoin rona lezada.

Alende ne'e, lezada kontinua konfirma faktu sira iha akuzasaun, lezada deklara katak momentu arguidu nia nú telefone iha lezada nia tian nia telefone no lezada foti arguidu nia número telefone hodi haruka mensagen ba arguidu no husi ne'e arguidu ho lezada gosta malu no namora malu, lezada deklara katak bainhira arguidu ba Díli husi ne'e arguidu komesa ladun telefone lezada no arguidu lakohi tiha lezada no lezada mós ba fó hatene arguidu nia bin no lezada nia bin fó hatene fali ba sira nian inan no sira halo keixa kontra arguidu.

Alegasaun finál

Prokuradór haktuir katak, arguidu komete krime hasoru lezada, mesmu iha julgamentu arguidu nega faktu sira, maibé lezada kontinua konfirma no reforsa mós ho relatóriu médiku husi Pradet, tanba ne'e husu ba tribunál atu kondena arguidu tuir artigu 187 KP.

Enkuantu defeza haktuir katak arguidu nega katak nunca halo relasaun seksuál ho lezada tanba momentu ne'ebá arguidu iha hela Díli, maibé lezada konfirma faktu sira hotu iha akuzasaun, tanba ne'e husu ba tribunál atu decide tuir konfiksaun tribunál nian.

Desizaun

Depoisde avalia faktu sira hotu, tribunál prova katak arguidu komete krime aktu seksuál hasoru lezada, mesmu iha julgamentu arguidu nega maibé lezada kontinua konfirma faktu sira iha akuzasaun.

Bazeia ba faktu provadu sira n'e no tetu mós sirkunstánsia hotu-hotu haleu krime ne'e nune'e tribunál konklui prosesu ne'e no kondena arguidu ho pena prizaun tinan tolu suspende ba tinan tolu.

Atu hetan informasaun liutan favór kontaktu:

Ana Paula Marçal

Diretora Ezekutiva JSMP

Telefone: 3323883/77040735

Diresaun e-mail: ana@jsmp.tl

info@jsmp.tl

Website: <http://jsmp.tl>